

天
台
山
全
志

天台山方外志原序

顧起元

史莫良於志天地人物禮樂刑名至奧渺夥蹟矣然而圖謀度數存焉虛可稽也實可錄也苟擅三長寧歎四善哉志莫良於山紀載之難有數端焉猿棲熊館鳥道蛇盤蠟屐從所未經樵斧繇來罕到卽有幽奇何緣覲覲雁宕徑僻於宋年黃海道登於明代非其驗與故真見難詳自昌黎慟哭於落雁之峰王陽迴馭於羊腸之阪文人墨客往往心快臥游具窮濟勝丹椒翠蘿月磴天崖祇標異於登高眺遠之篇間問奇於牧豎樵夫之口言之若夢槩乎有聞信耳旣非任目逾舛山之真形

從是遁矣故傳聞難據時易世移陵虛谷實曄隨方改
字以俗訛石翳蘚中疇覩神清之洞門潛水底詎窺小
有之天或古有而今無或此非而彼是文士疑而莫質
野老泐而不知辨而析焉良未易也故考証難精經丘
尋壑別引勝流攀木援藟必資曠日而或輶軒欲駕恨
束馬之未能杖履以遊虞羸糧之不繼非倥偬而靡暇
卽悵望而無力徒遙想於冥搜曷散懷於奮藻故結撰
難富兼而有之者其惟無盡大師之志天台乎師以法
中龍象坐大道場以舌上珠璣作大佛事墮舊志之未
廣愍靈跡之無徵析竹晨編然松瞑寫緝爲山志數十

萬言自山名以及文章有涉茲山者罔不採其故實綴
彼菁藻至台教之真文高人之遺韻尤加詳焉頃以請
藏金陵屬予爲序予受而卒業向之所難今之所易可
謂冥通地絡潛鏡山靈勒遐寶於清都垂洪謨於法界
者矣蓋其住山三紀振錫千峰徧尋不死之庭畢踐無
人之境有勝必窮無險不陟與夫目游未奇耳剽多妄
者異矣而又蘿封之字晉人搜羅樹挂之錢咸資考索
且日採月歷神畫形摹以故琪樹金松同檢桐君之錄
墨池茶圃雙甄管子之題巨細不遺名實無爽又何有
攷之未精撰焉未備者乎嗟乎覽應邵之記如禪岱宗

披王履之圖若臨仙掌猶曰地以文奇境因語麗耳至若道元之注水經旁洽異書靈運之賦山居廣陳奇物千載而下等諷詠於登陟婉簡冊於丹青志而若斯斯已偉矣師之天台庶幾是乎若夫精詮教貫宏闡宗風霏法雨於松樞霏慈雲於蘿幌花飄座側樂鼓空中斯又地靈以人傑逾章山筍與海藏同久者也被楊衍常記伽藍慧遠曾經廬阜厥稱著矣豈如斯志名寄區中理存方外將使絕粒茹芝之客默引瑤梯餐風味道之侶羣登寶筏者哉

天台山全志序

東南名山天台最著顧地居海濱非負濟勝之
具裹旬月之糧弗克遊遊亦弗徧余舅氏潘稼
堂先生性好山水足跡幾徧天下所過名山無
不探其幽窮其勝作爲詩歌記序以誌快辛未
歲遊天台有詩數十首遊記一篇余讀之不覺
神往恨不能置身華頂峰頭觀日月出入胸與
溟渤相吞吐也歲壬辰余房考張夫子以天官

大夫出守章安而天台在屬內私賀吾師得爲
名山主人可以不時登陟作爲詩文以發山川
之秘而自恨瓢繫京邸弗克負笈相從悵悵者
久之及甲午余以請養歸籍往謁吾師謂台山
庶幾可遊而時值炎暑病弗克登徒望靈山而
俗士之駕幾爲山靈所擯斥矣至乙未余以事
至武林而吾師亦新遊台山來自省會復具言
其勝并贈以遊山之資余遂得奮然於秋間先



謁吾師於章安而吾師方以山志無善本公餘之暇復取舊志手自刪訂與同幕顏子邇玉家曙升兩文學孜孜編纂而余亦適至任校讐之役爲一時風雅盛事余亟請其書歸搆善工刻之於是按途循軌遂作天台旬日之遊登赤城訪玉京過桐柏之故宮慨然見夷齊石像攬瓊臺之勝陟華頂之峰塵襟萬斛併入煙雲而俱化始嘆台山之不可不遊而余向於先舅氏遊

記中所見之山二十年神往而目存者一旦得
身窮其境嗚呼是亦足快也已然向非吾師爲
台山主人主盟風雅則余以孱弱貧病之軀安
能一再至而幾幾弗克遊者終得遊焉是余與
天台其良緣迨從天假而復與於山志之役得
附名不朽又何其幸也

賜進士出身翰林院庶吉士加一級前

特授內閣中書充武英殿書館纂脩吳江東谿

氏陳王謨謹識於溪上之德輝堂



天台山全志序

浙東山水之勝甲於天下而天台山爲
最考諸羣邑乘其所述者脩矣幽崖邃
谷千怪萬狀瑤臺瓊宇櫛比鱗次誠宇
宙間一巨觀也斯殆造物者之巧特爲
天地闢此奇境以爲仙佛之所窟宅雖
極古今來騷人韻士與夫羽流釋子作

爲文章播諸聲詩以形容夫幽奇之態
終未能盡其萬一也予垂髫時侍

先大人官於浙卽知有所謂天台山者
心竊向往之然猶未嘗見其全志而熟
悉其勝槩也茲奉

簡命視學兩浙私自幸以爲涉錢塘過會
稽因而之之岡門高士仙侶之所

居以償三十前之夙
按行台罷從檐帷中遙望層巒疊嶂峭
拔聳秀未嘗不凝眸注視悠然神往也
特以公事未竣不敢遽作登臨想適郡
守張君覺菴以天台山志示予披覽之
餘其山峙川流仙踪佛跡以迄景物之
奇詩文之工無一不備載其中恍若身

遊其地而親見其稂槩向之數十年來
徒托諸夢想而不得一見者忽於是焉
遇之不可謂非余之幸也及予將之溫
道經雁宕龍湫諸勝見奇峰萬仞瀑布
千尋幾令人歎觀止矣然晉人嘗有遊
雁宕自謂海內名山無有勝此及登天
台又恍然自失其規模宏大當更有異

焉者予今日得見雁山尤不能不以未
遍歷天台爲憾異時校讐稍暇得以登
臨嘯傲於其間相與窮幽極渺以畢平
生之志殆將以張君爲東道主乎張君
以名進士來守是邦其政事文章嘖嘖
人口予見其士習之敦樸文風之醇正
知有得於張君之教育浚矣而張君猶

以歲歉民貧不勝惓惓其用心爲何如也今閱是編搜討之精網羅之富令人睹其志愈想其勝由是而願遊者日以衆題詠者日以多山靈應爲之生色不獨台之士民樂得有賢太守卽台之山水亦樂得有賢主人也是爲序

康熙六十年辛丑菊月督學使者扶風

天台山全志序

周禮大司徒掌建邦之土地周知地域
廣輪之數職方氏則辨九州之圖使同
貫利故凡郡邑名山大川皆吏茲土者
所當稔知也自山經地志相沿而名山
之志以興其中形勝之險塞物產之宜
否以及古今文獻之考證皆於志乎詳

之此於民生吏道實有係焉豈徒侈陳
博雅取媚山靈云爾哉天台固山之知
名者也山顯於典午支謝諸公而興公
一賦金聲可擲後有明高僧輯方外志
一書猶惜其簡而未全郢中張君覺菴
來守是邦者數年予既嘉其政績庶幾
古賢二千石之風今者以公事來會城

出所纂天台全志相眎且索弁其簡端
予披閱終編見其網羅考訂不蕪不漏
洵志之善者且遐搜博采務得山之全
體與昔人所云周圍八百里處五縣中
央者相符不爽不大爲山川增色乎夫
予生平宦轍所經之閩之蜀之楚之吳
越所見隴山喬嶽危峰飛嶂烟雲變幻

奇偉萬狀者不可殫述而天台一山但
於幬帷中一仰止之遊屐未展恒覺闕
如今觀張君全志所錄恍如渡石梁陟
華頂懷夷齊之清風尋劉阮之遺跡而
赤城霞氣蔚蔚然襲予衣也則覽是書
者不較勝於張圖臥遊者哉明李於鱗
與徐子與書云太守甚苦書策稠濁吏

事旁午經術文詞一切無恙乎蓋文學
吏治兼之爲難今張君以公餘輯是書
既不違仕優則學之義而編中所載於
古之山經地志有加詳焉其與司徒暨
職方所掌亦庶乎有合也遂不辭而爲
之序

浙江等處提刑按察使司按察使加四

級王之麟撰



天台山全志序

天台山始見內經山記以及顧愷之支
道林謝康樂孔靈符輩逋有載記獨孫
興公圖狀作賦才藻葩流其名甚著自
時厥後薦紳先生與夫縉流羽人遊覽
棲託者屐齒相接述造之多見於文集
暨蒼崕蘚壁之間不可勝錄前代浮屠

傳燈編以爲誌其發凡起例於山經地
志之體未知何如然大槩侈於洞天福
地之說旁及幻變恍惚博物者難以徵
信也且版因歲久漫漶不重加增輯或
至傳譌失正恐貽名山之媿吾郢張君
覺菴博雅君子也由吏部來守是土風
清俗美人物豐樂乃於聽事閒暇集郡

士之賢而多識者相與重新釐訂搜討
摭摭刪繁去蕪務歸爾雅不以一處求
勝而以全體論山其爲文博而不支簡
而不漏非苟然者古大夫登高能賦山
川能說所謂德音之一於行役猶然况
身官其地適得明神隩區而志又職方
所繫顧聽其蕪沒已耶台去永嘉不遠

昔靈運作郡遂肆意傲遊理人聽訟不
復關懷今張君之與山水謀者都無政
事廢弛之失而吐納靈秀牢籠物態不
煩穿屐開徑足以張敘神臯俾後之觀
者以爲茲山之實錄其得失又何如乎
余故樂其志之成而爲之序

康熙五十六年仲夏兩浙督學使者江

夏汪滢書於嘉禾試館之慎獨齋

天台山全志序

舊稱天台山高一萬八千丈周圍八百里山有八重四面如一洞天福地與方丈蓬萊等夫山之高不可得而考也若計其周圍則今自赤城以至澄深由筋竹以至萬年縱橫不過一二百里耳安在其爲八百哉考縣舊志邑故始豐地

至宋建隆始改爲天台縣前後沿革或隸會稽或隸東陽或隸永嘉章安時移代易分析不同考范侍郎志要謂天台山處五縣中央即赤城舊志所指餘姚勾章臨海天台剡縣則知所謂天台山者逶迤延袤幅幘甚廣亦無定在故縣可界而山不可界後人遂以縣界而分

山於是山之不屬於縣者即遊屐所不到矣故統而論之山自會稽而來天姥石城皆台山也寧海之筋竹王愛皆台山也嵎縣之金庭桐柏亦台山也雖各有其名各具其勝要皆台山之屬耳而必以隸於縣者爲天台是失山之全體矣予素有山水之好壬辰春出守章安

私喜名山在隸可朝夕遊乃蒞任四載
王事倥偬時或過之徒神往耳今丙申
秋歸自省會始得信宿縣境歷覽名勝
探奇索隱塵襟俗慮一時盡滌登高遠
眺曠然四望天姥括蒼諸峰可指而數
大海錢塘歷歷在目既暢生平之大觀
而益知向所云八百里者其綿亘固不

止赤城桐柏華頂瓊臺諸山之勝而又
以境治遙隔不得遍歷諸勝爲憾也因
急索山志考之而自唐以來如神邕圖
經等書文獻之家鮮有存者惟明萬曆
間僧人傳燈著有方外志一冊採輯頗
詳筆鋒俊爽而惜其泥於方外似志釋
而非志山又其所採僅在一縣之內而

山之入於旁縣者未有所錄因於公餘之暇刪繁去蕪并廣采新昌寧海嵎縣名勝之通於台山者彙而輯之與夫郡人之詩若文足以發揮山川之秘者咸博訪而徧纂焉凡皆以爲山而載名曰天台山全志山靈有知其或快數百年之割裂一朝而復而後之遊者得其全

體其幽奇勝致所得當更倍於前人也
夫

時康熙五十六年歲次丁酉

賜進士第中憲大夫加三級知台州府事

前吏部驗封司郎中楚郢張聯元覺菴

氏撰

天台山全志序

少壯宦遊足跡遍於天下其間山川之
鉅麗巖壑之邃美爲平時所慨慕而遐
跂者幸皆得指識其地然停輿繫纜假
數日之程而身親遊歷者十不三四則
又所悵焉者也惟是博搜方輿地志及
勝覽勝概等書繙閱把玩如昔人張圖

畫於壁以資臥遊所苦操筆者裁鑒不
精採取無法惟以名勝之在人耳目者
爲之重複牽綴而於山之起伏水之源
流槩置勿考則亦陋略甚矣蓋作史者
莫難於作志而山水雜志即班氏地理
志之一非具才學識三長者不能爲也
昨歲恭承

簡命觀察浙東深喜四明天台皆在所轄

之內得以公餘乘興而夏間以事至台
信宿縣境深入仙窟瞻眺石梁并瓊臺
赤城諸勝莫不次第涉歷向之所謂悵
焉者今始得快然矣特是真誥中有山
高萬八千丈周圍八百里之說又登真
隱訣云山處餘姚勾章臨海天台剡縣

五縣中央而前之作志者何止以天台
一縣言也適台刺史張君覺菴以所輯
天台山全志請予弁首縱觀其書始知
所云全者已兼五縣之地志之五縣之
地盡而八百之說可無疑焉核是志成
而台山之全體始現似從前缺漏天故
斬其奇秘以待張君之開鑿也至搜羅

之富考訂之審更不待言昔人謂孫興
公一賦大爲山靈增色不知見是志者
又當云何張君以名進士起家胸中淹
貫全史其才學識於此見一斑矣是爲
序時

康熙丁酉歲長至後一日浙東觀察使
壽春梁文煊闇齋氏誤

重輯天台山志啓

竊惟瀛洲表異海外共想神山靈越正基宇內聿尊台
嶽五芝八桂孫興公旣奮藻於前萬壑千巖白玉蟾欲
乘風於繼望石梁以天矯銀河偏鎖長虹仰天柱以峻
嶒金闕還籠翠黛宮開桐柏休文欲解紱抽簪山拱鳳
凰純陽覓度人換骨結廬盤石厥號靈墟宴坐脩林爰
鐫佛隴呼吸堪通帝座詩思在華頂峰頭躋攀直犯天
門春色滿藤公嶺外玉霄疊嶂猶聞襲美之詩天姥重
崖曾入青蓮之夢高明爲翻經而始方廣與蓋竹爲鄰
路入桃源芒屨便通雙闕水分龍母星槎直走滄溟赤

城聳天半朱霞疑樹漢家之幟危瀑掛雲間白練憑誇
陸氏之經允矣洞天共賞靈仙窟宅誠哉福地寧讓蓬
閤煙嵐而且玉宇璿房原稱參錯瓊林瑤圃更爾璘璠
勝尋丈之天桃花開躑躅配龍葱之巨竹室護琅玕鶴
翎寔域外之葩琪樹豈人間之種黃精甘醴仙餌紛紛
紅朮香茅靈苗郁郁從來羽士惟此藏丹亦有緇流於
斯卓錫訪伊人於空谷誰傳真逸芳踪問脩景於槃阿
祇有傳燈舊志夫八重繚繞奇峰原聚於仙都而五縣
迴環勝致尚標於別邑金庭一觀照耀剡東王愛諸山
蜿蜒回浦乃未將圖經備攷而祇以邑乘爲憑以致闕

焉未詳亦或存而多穢

聯元

賞心幽壑作吏名區未辭

案牘之繁空憶間丘遺蹟每有山林之興長懷司馬高
風念居郡守四年擬輯天台一志必藉遠搜文獻庶幾
廣擴見聞如或錄有名篇或藏有善本或山間古碣未
蝕蘚苔或室內穹碑猶明鈎畫或名公鉅卿之記詠或
文人騷士之歌吟或黃冠開士卽景寫懷或旅屐遊筇
登高作賦或存全部或僅短章不以古今是限亦勿多
寡爲拘但係何代之人更屬何方之士務詳梗概勿使
差譌各檢曹倉共尋鄴架藉貽逸韻用集新編倘屬二
酉秘藏亦期一瓿借覽隨當完璧豈有爽言幸勿吝金

玉之音庶共聞山川之蘊云爾

天台山全志卷之一

楚郢張聯元覺菴輯

凡例

一天台無主山主峰爲諸山之總稱周圍八百里源自

括蒼天姥而來

方外志謂從關嶺過脈誤

頂對三辰當女牛分野

上應台宿孫綽賦云落五界而迅征李善註五縣之

界謂餘姚句章鄞剡始寧舊赤城志載棲山登真隱

訣云大小台處五縣中央註謂五縣係餘姚句章臨

海天台剡縣蓋因建置沿革不一故也今實界天台

新昌嵯縣臨海寧海五縣中央明釋傳燈恐靈蹟無

徵輯天台山方外志采故實而掇菁藻誠爲山靈寫
照但山川名勝止以天台邑乘爲憑則所云周圍八
百里處五縣中央者似屬無謂予覽而惜之因於公
餘涉歷台山旁採各志以補前志缺略名曰天台山
全志

一天台山高一萬八千丈惟華頂峰爲台山最高處下
瞰衆山如龍虎盤踞旗鼓布列之狀又如蓮華爲華
心之頂故名潘慎詩云此是名山第一層是也舊赤
城志與郡邑志俱載天台山爲首方外志舍天台山
不敘豈以無主山主峰故耶茲敘山仍首天台敘峰

則首華頂敘寺則首善興宗天台而尊華頂亦高山仰止之意也

一神邕山圖以赤城爲南門新昌石城爲西門徐靈府以剡縣金庭觀爲北門方外志中形勝考一篇核敘詳明以金地佛隴寒風關察嶺爲南門第一支螺溪幽溪爲南門第二支榲溪歡溪靈墟爲東門第一支王愛筋竹爲東門第二支大同澄深摘星石笕爲北門第一支慈聖金庭觀爲北門第二支會墅彩煙天姥爲西門第二左支關嶺秀溪白巖萬年爲西門第二右支此皆以華頂爲主而各門環向但將華頂亦

混列於西門石橋斷橋混列於北門青溪女校福聖
桐柏俱混列于西門則誤矣予謂應以金地至察嶺
爲南門黃振幽溪螺溪爲東南門王愛筋竹爲東門
第一支靈墟爲東門第二支大同澄深爲東北門慈
聖金庭爲西北門石橋斷橋萬年藤公會墅天姥彩
煙爲西門桃源關嶺白巖秀溪桐柏爲西南門則以
天台華頂爲宗主而八門定矣

一山志皆有圖而天台延袤旣廣圖其全則累幅難窮
若寫其一峰一巒則如八景之類未見全璧况嵐光
翠色與時變換原非圖畫所能模倣故不欲漫漶以

資唐突山靈之訃

一顧野王輿地志云天台山一名桐柏衆嶽之最秀者也天台縣西北崇道觀曰桐柏山寧海縣西四十里葛元煉丹處在天台極東亦曰桐柏山嵎縣東八十里亦曰桐柏山山之西有金庭觀真誥云天台山周圍八百里是言天台而桐柏在其中又云金庭桐柏山周圍八百餘里一頭在會稽東海際一頭入海中絲漢時章帝屬會稽郡至吳赤烏二年始析會稽東部置臨海郡且云一頭在東海際一頭入海中是言桐柏而天台在其中矣故天台山南至黃壇嶺青溪南二

十五里北至龍公馬嶺澄深寺北三十里寧海縣新昌交界東至海際西

至天姥彩煙始符山有八重周圍八百里之語并應以天台縣之桐柏山爲中桐柏寧海縣之桐柏山爲東桐柏嵎縣之桐柏山爲西桐柏

一 台邑西八十里天柱山而外與東陽縣分界尚遠東四十里至筋竹東北六十里至靈墟卽與寧海分界其大同之東澄深之北俱屬寧海分界故寧海一邑北自天門閬風臺南至桑洲小桐巖百有餘里間皆爲天台山左臂

一 天台山八百里中層巒疊嶂奇峰邃壑起伏翔舞千

態萬狀志中山峰巖嶺名目不能捫蘿越磴備考悉載尚有待於康樂冥搜之展也

一徐靈府云赤城山有瑤花芝草柳泌亦言天台山多芝草異藥故琪樹賦於興公金松賦於文饒鶴翎則花如芍藥杜鵑則高絜紫薇靈葩翠莖俱非常產其食物則黃精黃獨菰橡芋栗之屬藥物則交藤茯苓仙茅根子之屬俱勝於他處若穀蔬蟲介之繁不能概載

一山中非有社稷城隍學宮之祀但有祠宇列於山中或可式靡維風或能興雲致雨亦別列一條

天台志云以天台山
一之爲郡萌芽於漢至唐改爲台州志云以天台山
而名是時猶爲僻左惟釋道二氏六朝時卽早著見
聞偉殿穹堂上摩霄漢洞天福地大書圖籍宮觀寺
宇之富實台山爲最今道觀十廢其九僧寺亦十廢
其三子姑仍其舊而存之

一天台山爲神仙窟宅羅漢隱居雖不無荒唐過實然
晨肇桃源已有其地根碩赤城亦有其山至於孝先
稚川洪景平叔瓊瑄之徒著書養真原非凡骨而司
馬承禎與陳子昂李白王維賀知章輩爲仙宗十友
笑捷徑於終南著坐忘於桐柏卽蟬蛻非真其高風

可仰僧如曇猷智顗灌頂德韶輩俱有盛名而寒山拾得踪跡神異題詠頗多閒遠此卽所謂應真示現而人不之識耶因次列仙道志次列釋志

一古今代謝勝蹟未堙如書堂墨池遺鐘舊竈並或居址可考手翰可徵字鐫石上塔聳雲間俱令人徘徊空谷眺詠幽奇至於片石久埋碑文零落亦錄某人某時所撰以附於古蹟之末若攬勝亭臺以及從前珍賚俱載於寺觀之下毋庸複入

一羽仙身未到於台山並雜志或涉於渺幻雖有其事竝入存疑

一天台山名勝甲天下列代文人韻士登高賦詠者多矣古今名作存者盈篇累冊一景之下不能多列用另分卷帙仍以地名貫之以便稽考其散軼無存道遠莫致或祕於石室珍於幽人見聞未逮無計搜羅難免掛一漏萬之誚維博雅君子輯而續之

一所載詩篇惟摹寫山川名勝非因人品臧否去取故雖亡宋如秋壑而石橋一律亦不以人廢

一天台山名勝久著四方遊覽以及近地棲隱固多名賢本名之下止就見聞所及稍敘爵里若遊屐偶臨餘俟考訂續爲序列

一 是書於丙申秋始行採輯丁酉春開雕夏季卽告竣
爲期旣促而四方郵寄詩篇多有未至或一題已完
復寄有佳製則另爲續刊其題前後未免重出然將
來作者便可隨時付梓

形勝考

釋傳 燈

天台山高一萬八千丈周迴八百里山有八重四面如一復有四門智者大師以赤城爲南門以新昌石城爲西門徐靈府又以剡縣金庭觀爲北門余謂準此當以王愛山爲東門或者疑以爲誕不知皆有所徵也蓋名山福地必有神聖呵衛不祥惟此台山自古及今無有虎豹之暴曾以是訊諸山民僉曰四門之內周環民居卽有惡獸經由惟犬羊等物是殘見人則妥尾走匿草莽間審如是則所謂聖僧道場神僊窟宅信矣若取之則凡在台州屬境皆其區域以牛女分野何啻千里故

唐宋已來以台州名郡蓋取乎此若約靈異以分山憑諸書以割地則自縣治以南皆非也然台鴈二山皆東南勝境古人未有定其優劣者余始遊鴈宕見其峰巒秀拔奇形怪狀將謂海內名山無有勝此及登天台山觀其規模宏大又恍然自失因而品曰鴈宕山其猶李青蓮之五言古詩也天台山其猶杜拾遺之五言古詩也以子美之詩上薄風雅下該沈宋言奪蘇李氣吞曹劉掩顏謝之孤高雜徐庾之流麗盡得古人之體勢而兼昔人之所獨專近之故也蓋此山在下望之不啻千仞及昇其巔四通八達間皆可數十里如在平地其勝

一也至登華頂峰頭東望大海南觀鴈宕西矚括蒼北
眺錢塘一覽可盡其勝二也俯瞰羣峰皆在其下羅列
環遶或如蓮葉或如華鬚恍疑一朵芙蓉浮於海上其
勝三也僧寺道院桑麻相接鐘梵鳴於天上雞犬吠於
雲中其勝四也雖極其幽邃之地皆明爽開豁使人襟
抱蕩然其勝五也山與通衢左近車馬絡繹其下勝概
羅列其巔可望而不可到其勝六也山無背向四面如
一其勝七也山有八支八溪爲界以華頂爲車軸山之
周遭如八軸輪亦如八葉覆蓮其勝八也山產衆藥又
多肥蕨黃精此足供居者猴糧其勝九也山林深遠卽

居民亦有未臻其奧者可以避隱其勝十也且赤城爲其南標石城爲其西固東蒼爲其睂四明爲其目中有瓊臺雙闕佛隴香鑪石梁瀑布等諸景骨肉不偏形神俱妙所以爲勝也此其梗槩耳若夫赤城建標珠林簇簇誰其淡諸霞紅雲綠則有赤城山之勝五峰環翠宮殿俱高雙澗奏響和以松濤則有國清寺之勝溪界山出路沿澗入瀑布龍湫涼風襲襲則有金地道中之勝金地在上壁立萬仞蒼龍委蛇濟以天磴則有金地嶺之勝竹塢茆茨疎磬間發法語琅琅金繩寶筏則有定光菴之勝古塔皇封與山龍從瞻之仰之萬世高風則

有真覺寺之勝法流洙泗佛道康莊普賢境界脩禪道
場則有佛隴大慈寺之勝大雷峰下白雲精舍數里平
原幽人命駕則有太平寺之勝路入羊腸身親龍闕山
橡藤梨美哉膚核則有寒風闕道中之勝亦有桑麻非
人間者豈軒轅丘廣莫之野則有長壽文殊西竺諸寺
之勝萬山之中其嶺陂陀若槃之宮尚餘煙蘿則有察
嶺下高寮舊隱之勝此南門第一支取華頂之直道以
南輿溪爲界也若夫放生池上碧水盈隄有物龍去猶
名螺溪則有清心寺之勝長松數挺野廟披離昔人傳
教今歸與誰則有傳教寺廢址之勝疊嶂千重溪梁百

折泉落樹頭流雲噴雪則有螺溪道中之勝仰攀丹崖
危磴半欹梯雲捫葛乃可探奇則有幽谿嶺之勝幽谿
講肄車塵不喧山林盤鬱別有乾坤則有高明寺之勝
路隔三山可望難卽松篁數家泉流上泐則有清涼寺
遺蹟之勝下有寒泉藏蟄神龍石筍高峙砥柱虛空則
有螺螭潭之勝溪南溪北上游下游經梵相聞以耕以
脩則有黃潭諸菴之勝聖僧西歸惟遺雙屐精神不磨
竟化爲石則有聖蹟內外菴之勝此南門第二支取華
頂之紆路以螺溪爲界也若夫雲林覆殿寶篋藏經諸
天散花神鬼來聽則有慧明寺之勝覺路平平好山相

迎谷風溪水且輕且清則有樵溪道中之勝山藏太古
水奏琴心惟昔高士允矣知音則有齊高士顧歡隱處
之勝水窮山盡有地靈墟盤石可坐精廬可居則有天
封寺之勝此東門第一支取華頂之直道以樵溪爲界
也若夫丹山夷夷草木萎蕤何獨王愛我亦愛之則有
王愛山之勝脩竹千竿蘭若數楹長者福聚衲子化城
則有筍竹嶺菴之勝雲生足底人行天上誰挈我衣空
中五兩則有彌陀菴仰天湖道中之勝此東門第二支
取華頂之仄徑以水母溪爲界也若夫山光明媚水色
澄鮮真阿練若樂矣三禪則有澄深寺之勝猿梯達漢

鳥道通玄疑其登者居日月邊則有摘星嶺之勝山藏
八景高僧所安彼如菴主其塔猶完則有大同寺之勝
瑞草藉地拱木蔽天禽猿嘯聚杳無人煙則有石竄道
中之勝此北門第一支取華頂之岐路以羅木溪爲界
也若夫神僊福地茅竹洞天金庭觀側羲之家焉則有
金庭觀之勝路崎而勝水險而清籃輿竹筏恣我南征
則有福溪道中之勝山奇蹟聖佛慈如如豐碑古記元
章之書則有慈聖寺之勝方廣觀面供誰能見八萬度
門聊通一線則有石梁橋之勝瀑瀉懸崖石潭淙淙奇
哉誰設元龍之功則有斷橋之勝此北門第二支取華

頂之險路以福溪爲界也若夫千山倒景蘆荻藏舟中
有釣叟機忘海鷗則有青溪之勝青山峩嶷飛流界道
織女停梭牛郎凝眺則有瀑布水之勝仙人拍掌玉女
濺珠亦有僧寺是稱僊居則有玉女溪瀑布寺福勝觀
之勝九峰迢嶢元宮逍遙僊凡路隔度以三橋則有桐
柏宮之勝瓊臺薄漢雙闕凌霄其誰神司僊者王喬則
有瓊臺雙闕之勝此上有元明洞天仁靖純素諸宮白
雲壽昌諸觀聖壽法輪法蓮諸院臥雲菴等諸處之勝
小山爲伍環畚千畝寺倚危峰坎坎鐘鼓則有護國寺
之勝溪泛胡麻上有僊家雲中古洞尚餘桃花則有桃

源之勝其上有慈雲普光西定慧蓮華峰上普慈證教
諸寺之勝在焉此西門第一支取華頂之紆路以開溪
爲界也若夫石沼爲池石山爲城金湯像教功由巨靈
則有石城山之勝慈氏寶相百尺亭亭金光赫奕勤矣
三生則有石佛之勝採藥歸來雲仍七世桑梓猶存千
年僊系則有劉阮村之勝南有悔山北有悔橋司馬子
微悔從帝招則有司馬悔橋之勝將入僊都天爲設險
險豈在山塵凡難轉則有會墅嶺之勝紫雲蔽野亦翳
丹霞異產何物苓朮胡麻則有彩煙山之勝昔人夢遊
我亦玄菟靈僊窟宅葛洪丹丘則有天姥山之勝紅塵

白雲僊凡道分石梁捷徑瑞氣氤氲則有石梁道之勝
僊人鞭石如牛如馬亦如萬舟蔽流而下則有僊人浪
之勝其甘如醴其寒如冰應心之泉有待而興則有應
心泉之勝此西門第二左支以黃杜溪爲界也關嶺之
傍畱鄭有坊賢哉邑侯尚遺甘棠則有關嶺之勝石室
深邃厥名白巖神靈祥瑞余悉其凡則有白巖山之勝
萬峰攢翠列如畫屏一溪直界混混流青則有秀溪
之勝奇峰插天翠莊綠翳飛瀑如虹懸崖飄曳則有龍
湫瀑布之勝此西門第二右支以秀溪爲界也古木千
章平田數頃中有梵宮殆絕人境則有萬年寺之勝往

者聖僧歸自東海輕駕鐵船其湖猶在則有鐵船湖之
勝平田飯僧於是邀請松柏森森爲羅漢嶺則有羅漢
嶺之勝心外無法滿目青山香鑪峰側別開元關則有
通元峰香鑪峰之勝萬八峰頭寺鄰帝座天籟梵音六
時叅和則有華頂寺之勝身出五雲天空海闊星辰四
垂斗柄可幹則有華頂峰之勝此西門第二支取華頂
之康莊也是中有二岐路一至會墅由小路上藤公嶺
與萬年會校近十里而景差劣一至萬年過道人坑先
往石梁至察嶺頭會校遠五里而景差勝也若夫春日
載陽草木生香山花奪目好鳥相將則有春景之勝朱

明赫赫樹蔽原隰數里無塵泉流澗側則有夏景之勝
涼風振條林木蕭蕭蹲鴟黃獨山家正饒則有秋景之
勝元冥司職喧塵時息幽溪泉鳴圓通之宅則有冬景
之勝華頂峰頭旭日在下午沉乍浮魚龍驚詫則有日
觀之勝秋蟾皎皎繁露津津上薄林葉萬頃鋪銀則有
月觀之勝朝雲矯異高下平填疑清涼界敷兜羅綿則
有雲觀之勝江山飄瞥林木儼然珠宮玉闕吾亦神僊
則有雪觀之勝黃梅驟雨鼓以谷風或如飛瀑有似流
虹則有雨觀之勝朝雨初歇霧氣方收千巖競秀萬壑
爭流則有霽觀之勝余家幽溪鄰於佛隴濟勝之具旣

健遊山之杖復備有勝則遊興至則遊不必擇時招友
蓋台山之勝無論四時之佳雨霽雪月朝雲暮霞無不
可人者昔人以西湖比於西子謂淡妝濃抹總相宜余
謂台山之勝故當過之識者必以余爲知言然證明此
道者要有煙霞之志泉石興趣復須經旬累月不疲足
力乃可希覲其或朝入暮出旣無笙歌之娛耳復無桃
李之艷情以此責台山之不勝余則避席之弗暇焉今
依舊志復列山川形勝於左以貽好事者之博蒐妙在
觀象得意無得案圖索馬

天台山全志卷之二

楚郢張聯元覺菴輯

山

天台山 爲諸山之總稱按陶洪景真誥云天台山高一萬八千丈周圍八百里山有八重四面如一十道志謂之頂對三辰或曰當牛女之分上應台宿故曰天台一曰大小台以石橋大小得名亦號桐柏棲山登真隱訣曰大小台處五縣中央顧野王輿地志云天台山一名桐柏衆嶽之最秀者也徐靈府記云天台山與桐柏相接而少異神邕山圖又采浮屠氏說以

爲閭浮震旦國極東處或又號靈越孫綽賦所謂託
靈越以正基是也抱朴子內篇云諸山不可煉金丹
以其皆有木石之精惟太華少室緡雲羅浮大小台
正神主之可以修煉靈敞詭異爲天下巨觀又支遁
天台山銘序云往天台當由赤城爲道而神邕山圖
亦以赤城爲南門石城爲西門徐靈府小錄又以剡
縣金庭觀爲北門蓋皆指山之所至言之蜀樊建天
台山行記云自桐柏至華頂台山八重蓋其延袤有
如此者藏教所載羅漢靈蹟記有云赤城巖與天台
瀑布靈溪四明相連而天台懸崖峻特峰頂刺天下

有石橋跨澗晉束皙啓蒙記云天台去人不遠路自福溪水淺而清福溪在天台縣北四十里與華頂石橋相近范侍郎志要云華頂爲台山絕頂特秀其原遠未可窮昔人謂發脈紹興故孫賦以爲託靈越以正基又謂海濱起伏三百六十餘峰而融結於此按天台山處五縣中央赤城舊志載五縣謂餘姚勾章臨海天台剡縣因析置不一今實界天台臨海寧海新昌嵊縣

赤城山 在天台縣西北六里一名燒山又曰消山石皆霞色望之如雉堞因以爲名山之麓有巖極深廣

晉義熙初僧曇猷造寺號中巖齊僧慧明復就塑一
佛像名臥佛其上又有巖二曰結集曰釋籤蓋灌頂
湛然遺跡也西有玉京洞北有金錢池絕頂有浮屠
七級梁岳陽王妃所建下有洗腸井上有仙人井飛
流噴沫冬夏不竭支遁天台山銘序云往天台山當
由赤城爲道而神邕山圖亦以赤城爲台山南門張
亨鉞云赤城山仙史載茅司命所治爲第六洞天萬
山青翠此獨赭面如霞從縣小西門出門外卽赭溪
溪色類丹砂兩岸草木輝映景便明麗至下巖翠竹
叢翳青染人衣屋緣洞設楹向明開巖中滴水涼沁

心脾曲折登上巖亦有徑竹拂雲洞前一樓便於眺
覽巖上小洞口有玉京二字色淡黃層落不滅傳是
魏夫人煉丹之所左折至穿劍巖空懸天半中開一
線形如棗核右折至釋籤巖斗室茅椽乃湛然釋教
觀處過息遊闌經白蛇洞至頂有曇猷洗腸井茝畦
叢生不絕頂上浮屠係梁時所建佇眺羣山目窮天
表煙靄雲濤晴嵐雨氣隨時變換山後有數小峰迤
邐於尾遠觀如赤幟建豎此又赤城之變相也

金墩山 乃赤城山南行支壠盤曲迤邐與赤城輝映
桐柏山 在赤城山北十里七十二福地之一由青溪

迤北而入嶺路九折至洞門一望佳景豁然道觀屹
處其中唐司馬承禎隱此舊圖經云周靈王太子晉
主金庭治桐柏山卽此也按此山爲中桐柏洞門之
陰有透瓶泉泉甚寒冽盛以錫瓶則津津然滲漏於
外

方瀛山 由桐柏北上一峰可五里許上有平田十餘
畝間以陂池前眺蒼峰後卽雲蓋峰唐長慶中徐靈
府居此因賜今名

九峰山 徐靈府小錄云瀑布寺前有九峰蓋台山之
枝幹舊名九壘王羲之與支遁遊焉唐天寶六年改

九峰神邕山圖云此嘗創桐溪寺

按瀑布寺在桐柏嶺下則瀑布寺前

九峰山自卽桐柏九峰也赤城舊志亦不另載九峰山

司馬悔山 在天台縣北一十三里第十六福地司馬

承禎應召至此而悔因以爲名又雲笈七籤載司馬悔山在天台山北李明仙人所治之處山在天台新昌二境間又有司馬悔橋在新昌東南四十里亦因司馬承禎被召至此而悔故名

瓊臺雙闕兩山 自桐柏西北行二里至元應真人祠

取道仙人蹟經龍潭側凡五里至瓊臺雙闕皆翠壁萬仞森倚相向宋祥符中山人張無夢結菴於此徐

大受山行摘句云大壑之心瓊臺突起嵐光破綠狀
如削瓜下俯百丈龍湫心悸骨驚不可近視張亨鉞
曰從下觀上歷樵徑循坑而入潭石相間進五六里
許見瓊臺正面削突嚴整是錦翠蒼葢而成者其旁
兩山崖壁對峙如張繡屏皆削立至腳謂之雙闕令
人目眩神怡從上觀下取徑桐柏攀援而下絕壁森
倚峰巘層疊悚然心悸不可近視至半山有仙人座
形骸俱具如蟬蛻而去者馬鞍石駕太巖上人可攀
乘若月夜獨踞臺中如鋪金鑲玉烟爍人心目衆峰
淡遠皆隱見空濛杳靄間尤覺清曠絕倫夏竦銘云

瓊臺峩巖左右如闕直上相等蘿交蔓結啓閉雲氣
出入日月千里若綫羣峰如屑凌霄厭海吞吳跨越
靈墟山 白雲先生隱處圖經云在天台縣北六十里
七十二福地之一與寧海分界

鷓鴣山 在天台縣西北四十五里常有鷓鴣鳴故名
石橋山 在天台縣西北六十里兩山相並連亘一百
里舊傳五百應真之境有石梁架兩崖間龍形龜背
廣不盈咫其上雙澗合流洩爲瀑布西流出剡中下
臨萬仞飛泉回射危滑欹側狀如橫虹且多莓苔甚
滑過者目眩心悸按赤城舊志云凡往來人供茗必

有乳花效應或寶炬金雀靈跡梵嚮接于見聞云夏
竦銘山壤獻靈融結推功穹隆石梁飛雲架空垂流
下微絕岸旁通煙華溟濛矯矯翔龍朝日瞳眈蜿蜒
騰虹願接天孫以助登封

斷橋山 自石橋下菴對嶺沿澗行可十五里則一石
梁中斷因以爲名卽小石橋也下臨危澗亂石綦布
有龍湫龍拖石張亨鉞云由石梁左澗而入樹翳竹
暗披蓁覓路移石渡溪雖松莽羊腸亦有澗石平鋪
如砌高高下下旋至斷橋兩巖相闕如大甕萬丈白
虹捲空而來奔落甕中聲如崩雷墮石伏巖上伸頸

下視令人股戰齒擊是瀑下有數坎相連一坎輒停
一坎又下水態變幻無常傍山有龍拖石細狹蜿蜒
似龍形再行里許至嶺下則水珠簾飛流噴沫坐久
則寒骨沁心不復知有人世矣若冬雪後凌寒顧盼
更爲勝絕

龜山

在天台縣南五里

以下敘山
自南而西

鯉山

與龜山相近

銀山

在天台縣南十里

始豐山

在天台縣西南十五里舊以狀類盤龍名龍

山唐天寶中更今名

折山 在天台縣西十六里神邕山圖云其山峭崿險折中峰拔立孤秀舊傳王喬控鶴於此又名鶴峰

鼻山 在天台縣西南一十五里以形名載唐書地理志下有龍湫旱禱常應

土牆山 在天台縣西四十里屹若牆立故名見唐書地理志

旣山 在天台縣西三十五里下有釣磯石

瀑布山 一名紫凝山在天台縣西四十里有瀑布垂流千丈與國清福聖二瀑爲三其山出奇茗神異記云餘姚人虞洪入山採茗遇一道士引三青羊至此

山曰吾丹丘子也聞子善具飲今以茗奉給祈子他
日有甌犧之餘相遺也後嘗與家人入山獲大茗焉
千佛山 在天台縣西五十里山麓有廣嚴寺峰巒層
疊周圍佛剎故名

寒石山 寒山子所居今呼爲寒巖在紫凝山西三十
里前有盤石曰宴坐峰上有石室舊名拊石洞米芾
題曰潛真四山環峙如郭郭上矗雲漢其下嵌空置
佛屋不用瓦覆洞左有小甃塔是寒山子蟬蛻處由
宴坐西有石如植笋蘿蔓縈綴其西有石梁可數尺
架兩崖間險峻不可陟南有泉如屋雷寺僧磨竹鞭

引之前距山腹一里有道人洞轉西二里亂石灑流
巖竇間散若虬髯因號龍鬚洞台山絕勝處也臨海
記云石室前有立石參差五色遠望如綬帶舊傳爲
綬帶山產石髓石脂絕杪有仙人石棺

明巖山 與寒石山對峙舊名闇巖巖之前峭壁屹立
勢摩穹蒼亦號幽石其下竅穴透邃日光穿漏中有
僧全宰棲真洞轉北數步怪石森然上有兩峰倒側
號合掌巖西有泉蔽崖而下煥若垂箔寺僧亦用竹
綆引之從高下墜號曰水索由寺北捫蘿而下至重
巖磐石品列卽三隱嘯詠之地常有光如月號石月

其東有嚮巖擊之聲鏗然

雷馬山 在天台縣西九十里

天柱山 在天台縣西九十里南有黃水峰

東橫山 在天台縣東十里狀如覆舟故又名覆船山

四面迥絕無所連接卽丹丘山也相傳漢時有老姥
於此種菜採藥號丹丘老姥唐時又有劉仙人號澹
竹居士於此山脩煉故名丹丘其山土色紅潤頂方
而闊中多沃田泉水雖旱不竭神邕山圖謂爲台山
之腳其上坦夷可三十頃中有三泉冬溫夏冽西有
絹機巖南有犀牛望月巖北有雞籠石上有賽雨壇

卽曹法師祈雨處有許真君廟在焉又有書堂係朱文公與徐竹溪講學之所其小徑則竹溪所居也嘉靖間邑令鍾紐築丹丘臺於其上山之南盡處有石如婦人舊稱爲新婦巖

以下敘山自東而北

鳳凰山 在天台縣東十里志要云山形似鳳者三故其地亦名鳳林崖上有仙人掌跡甚鉅南有釣魚臺及呂洞賓所遊之地名爲呂道岸其地夏日蚊蠅不入所產艾草入藥最佳

亭山 在天台縣東三十里

寶華山 在天台縣東三十里產花乳石稍西有雲頂

菴

蒼山又名東蒼峰 在鳳凰山東二十五里神邕山圖
云其山凌映桐柏絕頂睇滄海以其蒼蒼接漢故名
古經云其山鳴吼必有大風雨神邕以桐柏接寧海
界在天台縣極東處非今置觀之桐柏也山有三潭
其龍最靈宋封靈澤孚濟侯

蔓蘿山 在天台縣東北三十里

覆盆山 在天台縣東四十里頂平東西二隅有二井
地理家爲台郡臨海山川之美皆自此胚胎迤衍發

秀

接石山 繫船山 俱在天台縣東四十里

松山 在天台縣東南四十里

招賢山 在天台縣東四十五里又名雙峰山

東掖山 在臨海縣東北四十五里舊經云天台之左掖也有隔塵洞

王愛山 在寧海縣西六十里與天台分界唐咸通中剋寇裴甫據寧海殺令陳仲翁懿宗遣王式發兵討之戰於海口上鰲海游三處甫敗遂從此山遁去通鑑作黃罕嶺誤按王愛山去黃振嶺十五里天台縣志載亦以高宗坐玩得名

自此山至柯仙山俱在天台筋竹嶺及靈墟之東俱

屬寧海

屈母山 在寧海縣西南八十里世傳屈晃徙家於此
母死葬焉亦名龍母山

三十六雷山 在寧海縣西三十五里自松壇至西溪
新田沿棧而上峰巒疊疊如貫珠三十有六係葛元
煉丹處西北通馬鼻三坑一名雷山有二十六峰
至澄深寺
三十里

梁王山 在寧海縣西三十里舊傳梁太清末侯景作
亂陳霸先兵起有王子避地於此故名或以爲元帝
誓也

桐柏山 在寧海縣西四十里在天台極東寧海界上
相傳葛元煉丹寧和山中後徙此按此山爲東桐柏
柯仙山 在寧海縣西四十里舊傳僧曇猷棄槎入天
台駐錫於此其地昔產牡丹

按寧海馬嶼爲天台山東北門三十六雷山西北
通馬嶼大同澄深則北通馬嶼

金庭山 山爲天台華頂之西北門在嶧縣東八十里
夏侯曾先志云越有金庭桐柏與四明天台相連靈
寶經云上有桐柏合生下有丹池赤水真誥曰桐柏
山高一萬五千丈周圍八百餘里四面視之如一其

一頭在會稽東海際其一頭入海中是金庭不死之鄉其山臺盡五色金也舊志山之西有小香鑪峰南有卓劍峰前有五老峰後有放鶴峰東有毛竹洞洞口有竹生毛節覆一節唐裴通記云剡中山水之奇麗金庭洞天爲最小香鑪峰頂有金庭觀卽晉王羲之宅有書樓墨池遺蹟

天姥山 在新昌縣東五十里高三千五百丈西連沃洲其脈自括蒼山盤亘數百里而來層峰疊嶂千態萬狀最高者名撥雲尖次爲大尖細尖其南爲蓮花峰北爲芭蕉山後吳錄云登此山者或聞天姥歌謠

簫鼓之音道家稱爲第十六福地石壁上有題字蚪斗形高不可識又有楓樹高十餘丈從皇渡而東爲萬年石梁從皇渡而西南爲關嶺

沃洲山 在新昌縣東三十五里山高五百餘丈與天姥山對峙道家稱爲第十五福地晉帛道猷法深支遁皆居之戴許王謝名賢多與之游亦蓮社之意有鷲鼻峰又有放鶴峰養馬坡世傳支遁放鶴養馬於此又有石封門題字巖諸景

劉門山 去沃洲五里山下有採藥徑劉阮廟沿溪而入有阮公壇山下居民多劉姓

東茆山 去劉門山五里一名遠望尖

彩煙山 在新昌縣南八十里山勢平行盤旋巍刻四面皆崇岡峻嶺居民雜處其間

泄上山 在彩煙東南從麒麟嶺度溪溪潭淵渟紺澈上數武開小谷口有石嶺細嶺旋折而上凡十餘盤皆迴峰翳樾流水縈濺似無投足處緣壁行數里忽開豁爽塏別有天地矣巍巒對峙遠岫插青佛宇樓觀幽敞深邃又有奇花翠竹峭石清泉足以怡神曠懷與華頂石梁相望